



Odluka
o davanju saglasnosti na Odluku o preraspodjeli sredstava planiranih
u Budžetu Grada Sarajeva za 2018. godinu
(prijedlog)

Predlagač: Gradonačelnik

Obrađivač: Gradska služba za opću upravu i
zajedničke poslove

Sarajevo, juni 2018. godine

Na osnovu člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08 - prečišćeni tekst), Gradsko vijeće Grada Sarajeva, na sjednici od _____ donosi

(prijedlog)

Odluku
o davanju saglasnosti na Odluku o preraspodjeli sredstava planiranih
u Budžetu Grada Sarajeva za 2018. godinu

Član 1.

Ovom odlukom daje se saglasnost na Odluku o preraspodjeli sredstava planiranih u Budžetu Grada Sarajeva za 2018. godinu, broj: 01-14-3410/18 od 06.06.2018. godine.

Član 2.

Ovlašćuje se Gradonačelnik Grada Sarajeva da donese odluku iz člana 1. ove odluke.

Član 3.

Odluka stupa na snagu danom donošenja, a objavit će se u „Službenim novinama Kantona Sarajevo“.

**PREDSJEDAVAJUĆI GRADSKOG VIJEĆA
GRADA SARAJEVA**

Igor dr. Gavrić

Broj:
Sarajevo, __.__. 2018. godine

OBRAZLOŽENJE

PRAVNI OSNOV

Pravni osnov za donošenje ove odluke sadržan je u članu 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08 - prečišćeni tekst), kojim je propisano da Gradsko vijeće Grada Sarajeva ima nadležnost da donosi odluke, druge propise i opće akte i daje njihovo tumačenje.

RAZLOZI DONOŠENJA

U cilju realizacije projekta održavanja utrke Formule E u Sarajevu u 2019. godini, a kako bi se obezbijedila sredstva za izradu Studije izvodljivosti predviđene urbane staze na precizno utvrđenoj lokaciji ili lokacijama unutar grada, Formula E operation, Limited, potrebno je izvršiti preraspodjelu sredstava planiranih u Budžetu Grada Sarajeva za 2018. godinu.

Imajući u vidu navedeno, a u cilju obezbjeđenja transparentnosti trošenja finansijskih sredstava budžeta Grada Sarajeva, Gradsko vijeće Grada Sarajeva donijelo je ovu odluku.

FINANSIJSKA SREDSTVA

Finansijska sredstva za realizaciju ove odluke nisu potrebna.



Broj: 01-14- 3410 /18
Sarajevo, 06.06.2018. godine

Na osnovu člana 7. Stav 1. i 2. Odluke o izvršavanju Budžeta Grada Sarajeva za 2018. godinu („Službene novine Kantona Sarajevo“, broj 1/18), gradonačelnik donosi:

ODLUKU
o preraspodjeli sredstava planiranih
u Budžetu Grada Sarajeva za 2018. godinu

Član 1.

Ovom Odlukom, sredstva planirana u Budžetu Grada Sarajeva za 2018. godinu ("Službene novine Kantona Sarajevo", broj 1/18) na poziciji 821000 – Adaptacija i opremanje poslovnih prostora GS u iznosu od 148.000,00 KM i 614400 - Projekat svjetlosna dekoracija Grada Sarajeva I faza u iznosu 200.000,00 KM sredstva se preraspodjeljuju i preusmjeravaju na poziciju 615700 – Izrada Studije izvodljivosti predviđene urbane staze na precizno utvrđenoj lokaciji ili lokacijama unutar Grada, Formula E operation, Limited, u iznosu od 196.000,00 KM (100.000,00 Eur) i to sa budžetske pozicije 821000 – Adaptacija i opremanje poslovnih prostora GS u iznosu od 148.000,00 KM i 614400 - Projekat svjetlosna dekoracija Grada Sarajeva I faza u iznosu 48.000,00 KM .

Član 2.

Za realizaciju ove odluke zadužuje se Gradska služba za opću upravu i zajedničke poslove i Gradska služba za finansije.

Član 3.

Ova Odluka stupa na snagu danom donošenja.

Obrazloženje

Pravni osnov za donošenje ove Odluke sadržan je u članu 7. stav 1. i 2. Odluke o izvršavanju Budžeta Grada Sarajeva za 2018. godinu, kojim je propisano da preraspodjela sredstava ne može biti veća od 10% ukupno odobrenih rashoda i izdataka, a preraspodjela je iznimno dozvoljena po odluci Gradonačelnika, na prijedlog Gradske službe finansija.

U Budžetu Grada Sarajeva za 2018. godinu planirana su sredstva na poziciji 821000 – Adaptacija i opremanje poslovnih prostora GS u iznosu od 148.000,00 KM i 614400 - Projekat svjetlosna dekoracija Grada Sarajeva I faza u iznosu 200.000,00 KM.



Budući da nisu planirana sredstva na budžetskoj poziciji 615700 – Izrada Studije izvodljivosti predviđene urbane staze na precizno utvrđenoj lokaciji ili lokacijama unutar Grada, Formula E operation, Limited predloženo je da se navedena sredstva preraspodjele, kao u članu 1. ove odluke.

Na inicijativu gosp. Samira Cerića, poduzetnika iz Velike Britanije koji je rođen u BiH, Grad Sarajevo je prije 6 mjeseci započeo neformalne razgovore o mogućnosti održavanja utrke Formule E u Sarajevu polovinom 2019. godine.

Formula E je takmičenje koje organizira Međunarodna automobilistička federacija (FIA), pod čijim okriljem se organizira i Formula 1. Bolidi Formule E su električni trkaći automobili, a prva utrka održana je u Pekingu 2014. godine. Sve utrke Formule E održavaju se u središtima velikih gradova (npr. Hong Kong, Mexico City, New York, Rim, Pariz, Berlin, Santiago, Zürich) i u njima učestvuju slavni timovi i proizvođači, a utrkama se promovira zelena tehnologija. Formula E je postala drugo takmičenje po popularnosti i medijskoj zastupljenosti u hijerarhiji FIA-e, odmah iza Formule 1. Ona iz dana u dan postaje sve popularnija i atraktivnija i privlači sve veći broj obožavatelja automobilizma i ljubitelja tehnologije. U utrkama Formule E učestvuju i nekoliko bivših vozača iz Formule 1, kao što je Jacques Villeneuve.

U aprilu 2018. godine u Londonu, u sjedištu Formule E, održan je sastanak između gradonačelnika Sarajeva i čelnih ljudi Formule E. Na tom sastanku je rečeno da je Sarajevo ušlo u uži krug aplikantata za kandidaturu za organizaciju utrke Formule E 2019. godine u Evropi.

Budući da je ekološki faktor ideja vodilja Formule E, Sarajevo je ocijenjeno kao jedan od evropskih gradova s najviše zelenih površina, te je rečeno da postoje velike šanse da Sarajevo dobije ovu utrku 2019. godine. Utrke bi se održavale jednom godišnje u periodu 3-5 godina, u ovisnosti od dogovora sa vlasnikom licence.

Da bi Sarajevo i zvanično dobilo kandidaturu, potrebno je da tehnička ekipa Formule E dođe u Sarajevo kako bi dala konačnu ocjenu o mogućnostima i uslovima za održavanje utrke, na osnovu rezultata studije izvodljivosti koju bi trebalo izraditi u tu svrhu.

Za izradu studije izvodljivosti potrebno je izdvojiti sredstva u iznosu od 100.000 eura, koja je potrebno platiti vlasniku licence, neovisno o rezultatima studije. To je definirano u nacrtu Ugovora o studiji izvodljivosti između Grada Sarajeva i kompanije Formula E Operations, koja je vlasnik licence.

Eventualna pozitivna ocjena po studiji izvodljivosti i održavanje takmičenja Formule E bi predstavljalo veliki događaj za Sarajevo i postavilo bi naš grad na mapu Formule E zajedno s ostalim velikim svjetskim gradovima. Pored popularnosti i atrakcije, u ekonomskom i turističkom smislu takvo takmičenje donosi znatna sredstva svakom gradu u kojem se održava, te tako doprinose i afirmaciji Grada Sarajeva, a da za to sredstva nisu planirana Budžetom Grada Sarajeva za 2018. godinu, pa je neophodna preraspodjela sredstava za ovu namjenu.

Shodno iznesenom, predloženo je da se navedena sredstva preraspodjele, kao u članu 1. ove Odluke, za realizaciju navedenog u iznosu od 196.000,00 KM (100.000,00 Eur).

GRADONAČELNIK

mr. Abdulah Skaka

Dostaviti:

- Gradska služba za opću upravu i zajedničke poslove
- Gradska služba finansija,
- a/a
- u spis